

# 江氏族譜

江氏族譜

江

氏

族

譜

江氏族譜序

余嘗私恨鼻祖贊善公以來人物  
間出而世次官閥學行文章皆沒而  
不紀無以詔後世欲兼舉史記年表  
世家之體列而爲圖而附見行事以  
傳信來裔方作意哀輯未及成書而  
堂姪知郴陽太守元忠先吾着鞭考

訂舊譜序而冠之以敦睦宗盟且囑  
余爲後序謹按吾宗上世常以耀德  
戢兵懷柔遠人爲國長慮近代以來  
多得志於東南文名之邦肇自伯益  
列舜九官佐禹平水土而已昌言格  
苗文德遠暢賜姓嬴氏支分派別爲  
顯諸侯入春秋而有國於江者實與

齊侯衣裳之會至戰國時江乙爲楚  
策士尊君抑臣備論北方之所以畏  
楚蓋以國爲姓迄晉有江統者世居  
陳留常建徙戎之策號爲經國遠圖  
而僕射霽公從元帝南渡以獻替聞  
於江左則我贊善本公之所從出  
也今

天子方體舜禹之治化懷遠柔邇致理不  
以兵車而根本之地實在東南此固  
吾前世所以効忠濟時之良會而不  
墜先聲我後之人所宜同勉者也故  
脩書之若夫世代之相承人物之旁  
見則有列代之史在

宋紹興十八年戊辰十二月

望日

九代孫左廸功郎充洪州學教授

鵬程萬序

江寧方言

民國七年重修

江氏族譜序

春秋時魯叔孫穆子如晉亡范宣子  
問曰古人有言死而不朽何謂也穆  
叔未對宣子曰昔勾之祖自虞以上  
爲陶唐氏在夏爲御龍氏在商爲豕  
韋氏在周爲唐杜氏晉主夏盟爲范  
氏其是之謂乎穆叔曰以豹所聞此

之謂世祿非不朽也太上立德其次  
立功其次立言雖人不廢此之謂不  
朽安正竊嘗愛穆叔之論剴切精詣  
至理所在聖人復起不能易也吾宗  
出顓頊玄孫伯益之後封於江子孫  
以國爲氏自是迄今上下數千載本  
支傳序則有轅陽侯之功烈諫議大

夫之巨孝黃門徙戎之論爲經國遠  
圖僕射竭誠獻替東陽潛德不耀固  
非一於保姓受氏世守宗祊而已

贊善本公克踵前修喜待遇賢善以詩  
書教子孫其所以聿修厥德無念爾  
祖之意固無歉於穆叔之所云耳  
公之子七人孫十六人曾孫六十一

人元孫一百四十四人距今十有三  
世雲來之屬千人致身卿相潤澤生  
民今雖未見至於清白傳家累垂忠  
節如漢陽袁氏名德相望代爲孝友  
如蘭陵蕭氏穆雀柳氏亦未謂全無  
其人也積善之家必有興者姑遲之  
以待天之定也雖然陳留考城原有

二族間 叔祖監簿處中 宣議公

濟博學好古嘗自贊善推而上之至  
於陳留僕射綽有世次與考城諸江  
分派舊矣是以今之譜書特畧彼而  
不序庶亦異乎言李悉出隴西言劉  
悉出彭城者矣後之觀者得有攷焉  
是爲序

宋紹興十八年戊辰九月朔日

十代孫右朝請郎知郴州軍州

主管學士兼管內勸農營田事

賜紫金魚袋安正元忠撰

江氏族譜序

余閱梅上江氏譜有十世孫安正叙  
叔孫穆子之言謂人有宗非但保姓  
受氏必有所以爲不朽者立德立功  
立言是也江氏之宗諫議大夫輩之  
巨孝乃德之大者轅陽侯喜之從伐  
亦功也黃門侍郎統之論徙邊亦言

也統之八世興爲建安令始居建又  
十一世寵號梅上公公之子本仕唐  
爲贊善大夫至是族始盛贊善公之  
子七人次二支爲西廂使冲次五支  
爲常侍暉孫十六人曾孫六十一人  
玄孫一百四十四人餘無聞焉予因  
是慨念古者宗法自繼別以下皆以